

մեջ: Նրա վրայ նայում էին գիւղացիները, որպէս իրանց նահապետի կամ պատրիարքի վրայ: Թէեւ Աւօն այժմ պաշտօնապէս ստացել էր «միրէ տիտղոսը եւ համարում էր տեղային հայերի գլուխ կամ ներկայացուցիչ, եւ շէյխերի մեջլիսում ծնկի տեղ ուներ, ասիւամենայնիւ, նա չէր թողել իր պարզ, անփառասէր յարաբերութեան ձեւը հասարակ ժողովրդի հետ: Նա իր վարուեցողութեան մեջ ոչ մի բանով չէր ցոյց տալիս, թէ ինքը պաշտօնական մարդ է, թէ նա մի բանով բարձր է, քան հասարակ ամբօխը, այլ նայում էր ժողովրդին որպէս գերդաստանի հայրը իր ընտանիքին: Նա մինչեւ անգամ չէր թողել իր հին սովորութիւնները, իր հին պարապմունքը. շաբաթը մի քանի անգամ, հրացանը ուսից քարշ գցած, նա կ'երթար որսորդութեան. եւ այդ անում էր նա ոչ թէ զոարճութեան համար, այլ իր սիրելի արհեստը պատուելու համար:

Աւօն այս երկրում եւս գաղթական էր, որպէս Սալմաստում. ինչո՞ւ էր թողել իր բնիկ հայրենիքը, կամ ո՞ր տեղացի էր նա, – այդ մի գաղտնիք էր, որ սաստիկ կերպով պահուում էր նրա ընտանիքի մէջ: Բայց շատ անգամ ծերունի որսորդի թաւամագ յօնքերը խոժոռում էին, շատ անգամ նրա բարի դէմքը պատում էր տխրութեան մռայլը, երբ հարցնում էին նրա անցեալից, երբ խօսք էր բացուում նրա հայրենիքի մասին: Երեւում էր, նրա անցեալը թողել էր խիստ տխուր յիշողութիւններ, որոնց մտաբերելը ոչ միայն անախորժ էր թւում, այլ մինչեւ անգամ սարսափ էր ազդում այդ անբախտ մարդու վշտահար սրտին...

### ԻՂ. ՄԻ ՓՈՔՐԻԿ ՅՈՅՑ

Ծերունի որսորդը դարձաւ տուն միւս աւուր երեկոյեան պահուն: Կարօն եւ իր ընկերները ցայտնոտեցան: Նա ասաց, թէ մի անակնկալ դէպք առիթ տոտեց տղերքին մի օրով ետ ընկնել այն գործից, որի պատճառով պէտք է գնային մի տեղ: Ի՞նչ գործ, որտե՞ղ, – այդ մասին նա ոչինչ չխօսեց: Ես խնդրեցի նրանից պատմել դէպքը: Նա ասաց, որ շատ յոգնած է, պահանջեց մի բան ուտելու եւ խոստացաւ ընթրիքից յետոյ պատմել բոլորը: Մարօն մի քանի րոպէում կատարեց իր պատուը. ես չմօտեցայ սեղանին, որովհետեւ ամենեւին ախորժակ չունէի: Ես միայն նայում էի Մարօին, որ նստած իր մօտ, մատների աննշմարելի արագութեամբ գործում էր գուլպաներ, եւ առանց լռելու խօսում էր, թէ ինչ դրութեան մեջ նա գտաւ ինձ «քանդորած մատուռիէ մօտ, թէ մտածում էր նա «իմ գլխին մի օյին խաղալ», ամենեւին չցոյց տալ, թէ ինքը Մարօն է, եւ կողոպտել ինձ, որովհետեւ ես քնած էի, շատ